

四庫全書

經部

欽定四庫全書

經部

四書管窺卷二

詳校官給事中臣丁雲錦

刑部郎中臣許兆椿覆勘

總校官進士臣朱 鈐

校對官編修臣邱庭澂

謄錄監生臣汪名達

欽定四庫全書

經部八

四書管窺

四書類

提要

臣等謹案四書管窺八卷元史伯璿撰伯璿字文璣温州平陽人據所作管窺外篇成於至元丁未即元亡之年計其人當已入明然始末不可考矣是編見於祕閣書目者五冊楊士奇東里集則稱有四冊刻板在永嘉郡

學永嘉葉琮知黃州府又刊置府學是明初  
印行已有二本然刊板皆散佚不傳故朱彝  
尊經義考注云未見此本乃毛晉汲古閣舊  
抄大學中庸孟子尚全惟論語闕先進篇以  
下蓋傳寫有所佚脫然量其篇頁釐而析之  
已成八卷經義考乃作五卷或誤以五冊為  
五卷歟其書引趙順孫四書纂疏吳真子四  
書集成胡炳文四書通許漁四書叢說陳櫟

四書發明及饒氏張氏諸說取其與集注異  
同者各加論辨於下諸說之自相矛盾者亦  
為條列而釐訂之凡三十年而後成於朱子  
之學頗有所聞發考朱子著述最多辨說亦  
最夥其間有偶然問答未及審核者有後來  
考正未及追改者亦有門人各自記錄潤色  
增減或失其本真者故文集語錄之內異同  
矛盾不一而足即四書章句集注與或問亦

時有牴牾原書具在可一一覆按也當時門人編次既不敢有所別擇後來門戶既成主持彌力讀朱子書者遂一字一句奉為經典不復究其傳述之真偽與年月之先後但執所見一條即據以詆排衆論紛紜四出而朱子之本旨轉為尊信者所消矣夫載寶而朝論南宮者有故越境乃免惜趙盾者原誣述孔子之言者尚不免於舛異況於朱門弟子

斷不及七十二賢又安能據其所傳漫無釐  
正伯璿此書大旨與劉因四書集義精要同  
而因但稍為刊除伯璿更加以別白昔朱子  
嘗憾孔門諸子留家語作病痛如伯璿者可  
不謂深得朱子之心歟乾隆四十六年五月  
恭校上

總纂官

臣紀昀

臣陸錫熊

臣孫士毅

總校官

臣陸

費

墀





欽定四庫全書

四書管窺卷一

元 史伯璿 撰

大學

章句序曰蓋自天降生民則既莫不與之以仁義禮智之性矣 通謂朱子四書釋仁義禮智兼體用獨智字未有明釋愚嘗欲竊取朱子之義以補之曰智者心之神明所以妙衆理而宰萬物者也沈氏曰智者涵天理

動靜之機具人事是非之鑑輯釋亦引此說

通補智字之訓如此蓋本朱子大學或問論知字之義而言也然智是體知是用智是知之理知是智之事知之於智猶愛之於仁也今以論知字之言為智字之訓則似乎詳於用而略於體者恐有未安但以朱子釋仁義禮之義者較之可見況其語句又非訓釋字義之體沈氏之說亦然若以為論智字之用則可若以為訓智字之義則似未當又按饒雙峰嘗補

智字之訓曰智者知之理心之別程勿齋字訓於智亦曰別具之理為心之覺無已則於二說擇取其一乎但朱子唯訓仁字為心之德愛之理於義於禮已不如此下語矣假如朱子自訓智字又未知果如雙峰勿齋之語句否當兼存之以候知道者之折衷焉

愚見寓在外編

人生八歲皆入小學而教之以灑掃應對進退之節禮樂射御書數之文通引齊氏謂上三者言節下三者

言文文者名物之謂非其事也 通自謂洒掃應對以  
節言者小學不惟當習其事事之中有品節存焉是小  
學當行之事也禮樂射御書數以文言者小學未能習  
其事姑習其文義而已是小學當知之事也 輯釋亦

引齊氏說

以文為名物文義之文主知而言豈非以博文學文  
之文亦皆主知而言耶竊恐未然蓋此以文對節而  
言便是天理節文之節文分而言之亦對舉以互見

耳非謂言節者不可言文言文者不可言節也朱子  
曰小學者學其事大學者學其小學之事之所以又  
曰古文如禮樂射御書數大綱都從小學中學了大  
來都不費力詳此則謂以文言者未能習其事姑習  
其文義是小學當知之事者未必然也饒氏亦曰內  
則十年學書計即六書九數也成童學射御即五射  
五御也十年學幼儀禮之小者也十三以上學樂誦  
詩舞勺舞象即六樂也詳此則齊氏非其事也與通

未能習其事之說其不然猶為易見若更以數之一  
端明之則六年嘗教之數矣非使之習其名物文義  
而何至十年又使之學計計非使之以數而計其多  
少乎此即習九數之事可知讀者其試思之

饒氏輯講論大學綱領其不同於章句者有三今舉而  
辯之如左

一謂至善是事物當然之則非指明德新民造極之地  
而言也

按此與章句事理當然之極盡夫天理之極之說不同蓋饒氏之意亦以為至善之至是無過不及之意若以為至極之義則過乎中而不可以為訓矣故此說殊不思章句曰當然之極又曰天理之極當然對不當然而言天理對人欲而言極則盡乎十分之謂當然便是恰好之意即中之所在即無過不及之謂也天理豈外是哉當然而未至於極便是有不當然者雜於其中天理而未盡其極便是有人欲雜於

其中當然善也九分當然有一分不當然善未得為至也天理善也九分天理有一分人欲亦善而未至也須是當然則十分當然天理則純是天理方可為善之至至九分有一分未盡便是於天理當然處有所未至便是不及乎中直至十分全盡方是恰好處方是無過不及之中以此推之則章句有何可疑若如饒氏說則當然不必十分當然天理不必十分天理只五六分當然天理便是至善所在如此則如堯之



仁舜之孝孔子之學皆不免有過於中反不得為至善耶讀者疑必有見於此

二謂格物只要窮究那日用事物當然之則以知吾所當止之地非是欲人窮極事物之理以至於無所不知也

此說不為無理但自以為與章句不同則實無不同者此蓋因誤看了第五章補傳必使學者即凡天下之物一句所致當於彼章辯之

三謂誠意是正心修身之要不是正心脩身之外別有一件事誠實也

此當於第八章辯之

饒氏又謂魯自少讀朱子大學之書於前三者反之於身自覺未有親切要約受用處近讀先生與勉齋書謂大學一書看者多無入處似此規模太廣令人心量包羅不得然後知先生晚歲亦不能不自有疑焉

大學一書學者所以學至於聖人之法程也自三代

以前能盡是道而造其域者可數也孔孟既沒因其書而得其傳者惟周程張朱數君子而已是知雖曰人皆可以為堯舜然氣質不齊用力不易所以得造其域者亦鮮至於教人之法則不容自貶以御學者之不能也蓋其法不如是不可以由之以造聖人之極至耳然則朱子與其徒之書非歟曰此書固宜有之然其本意得非正以教人之法既不容自貶而又不得中行之士而與之故發此歎亦猶聖人衰世之

意邪況亦但謂大學一書規模太廣亦未嘗有自病章句之意則其為無可奈何之辭明矣觀於孟子大匠不為拙工改廢繩墨等言可見不然誠意一章朱子易簣之際猶不廢改豈有果知章句有太廣之病乃徒形之慨歎而不之改邪且雙峰自謂反身未有親切受用處亦既一切變易章句之旨而自為之說固宜自得親切受用處矣愚不知其由此進德到得何等地位可以任道學之傳否其亦大言以欺世而

已非實然也

饒氏謂明明德章句說是明之於既昏之後某以經傳文意詳之似只說因其本明而明之

德本自明故曰明德若不因其既昏又何待明之之功而後明哉雙峰以為只因其本明而明之則是未嘗有所昏也未嘗有所昏則是生而知安而行唯堯舜性之之德可以當之此則不待明之而自無不明者也雖湯武反之之事亦是未免先有所昏但湯武

善反之以復其本然者爾若以本體之明有未嘗息者為本明則未嘗息者與本自明者固自大有間哉譬之於火不假吹噓之力自然光燄燭天煙不得鬱物莫之蔽者本明者也撲滅之餘僅有一燼之微存於死灰之中不可得而盡熄吹噓之則仍復熾盛者未嘗息者也讀者欲分章句饒氏之得失當以是推之

饒氏又曰章句以慎獨為慎之於念慮萌動之始

某則

謂念慮自始至終皆在所謹

此當於中庸說慎獨處辯之此不暇及又按語錄有  
曰這獨也不是恁獨時如與衆人對坐自心中一念  
或正或不正此亦是獨處推此可見章句本意非饒

氏所識饒氏自謂已說却不出章句之意

此當在第六  
章饒氏

自述其所見與章句異  
處而先言之故實於此

經止至善章句止者必止於是而不遷之意叢說至  
善只是義理極處所中必止於是是不可不及不遷是

不可過

此亦祖述雙峰之意以為說者也但雙峰說至字之意明與章句不同又何必強推章句之說以求合雙峰之意乎竊意必至於是是不可不及似矣不遷是不可過則恐未然何則至善是極好處至是無以復加之意患其不及不患其過如山之絕頂一般未至絕頂固是不及至絕頂而遷從他處去亦只是下山了但可言不及不可言過又如月之圓缺一概唯望



夕十分滿輪方是至善之意未望明未滿魄固是不  
及之意過望而虧又豈可以言過乎若以至善言之  
則孝是善孝如大舜方是至善若以刳股之類為孝  
此則大舜所必不為者且不得為善之至矣况可謂  
之過乎如此則遷只當作移動之意說不遷如說不  
退轉相似語錄有曰既至其地則不當遷動而之他  
又曰到此不能守亦不可謂止其意蓋可見矣

通謂必至於是知至至之之事不遷知終終之之事

輯釋亦引此說

按文言知至至之程傳以為致知也知終終之程傳  
以為力行也或問於朱子曰至之是已至其處否曰  
未至是知得到至處方有箇向空處正要行進去知  
終終之是已至其處了終之而不去詳此則章句必  
至於至之至是已至其處之謂不但如知至至之之  
為向望要進之意也況必至於至之以知言之則  
智及之之謂以行言之則造其域之謂是固兼知行

而言不如知至至之專指知而言之此其曰不遷以  
知言之則知之弗去是也以行言之則仁能守之之  
謂是亦兼知行而言亦非如知終終之專主行而言  
之比也今引文言為證則似乎必至於是是知止於  
此不遷是行止於此恐於文言大學之旨兩不相當  
而皆失之讀者其參攷焉可也若以必至於是為知  
至知終不遷為至之終之則庶乎可耳

饒氏謂至善只是事物當然之則非指造極之地而言

也又曰止者毋過毋不及之謂

此即叢說  
所祖述者

通謂章句

此極字本傳中君子無所不用其極或問曰是其所以得之於天而見於日用之間者固已莫不各有本然一定之則然則所謂事理當然之極者事理當然之則也下文曰有以盡夫天理之極者盡夫天理之則也曷嘗以造極之地為言哉

此已於前辨之矣又按語錄有曰至善只是十分盡善處猶今人言極好又曰善者固是好然方是好未

是極好處必到極處便是道理十分盡頭無一毫不盡故曰至善以此觀之則至善之至朱子何嘗以為不指造極之地而言哉造極之地方是天理十分盡處天理盡處便是當然之則何過之有其曰本然一定之則亦以理出於天而非人力所能加損又十分盡頭而無一毫人欲之私而已若不出於天則非本然之謂若有一毫未盡則非一定之謂矣然則造極之言正朱子之本意通者何必為朱子諱哉若必以

造極為諱則為善亦以十分盡頭為諱耶或問章句之意似毋容以異觀雙峰不知已意與章句之意只一般乃是已非而章句通者又不知或問之意與章句只一般乃援或問之言以諱章句極字非造極之謂讀者但以或問語錄玩之則章句之意自明本無可議亦不必諱也

經明德至善章句具衆理應萬事事理當然之極通  
異端言理不言事大學言理必及於事故章句釋明德

至善云然

異端以理為障又何嘗言理要之異端只認得箇虛靈不昧底於具衆理應萬事者皆不知也固是無用又何嘗成體

定靜安慮得 饒氏謂定靜在事未至之前安慮在事已至之後安慮在事已至之後此句恐未當竊意安與定靜皆在未有事之前慮是處事謂是事方來之時可也後字似未甚切當今輯釋引饒氏此說果云

定靜安在事未至之前慮是事方來之際與輯講不同想亦覺其未當而改之耳

知止靜安慮通引方氏曰異端亦說得能定靜安了只是處置事物不下便是不能慮慮只是能處置事大學定靜安是活底定靜安根源從知止上來如孟子知言然後自然不動心之意所以事至而能慮異端定靜安是死底定靜安但冥然無覺而已如此則異端非獨不能慮雖硬把捉得定靜安亦不可謂之



能也疑似之間是非之辯不可不察

通曰定而能靜則事未來而此心寂然不動者不失安  
而能慮則事方來而此心之感而遂通者不差 輯釋  
亦引此說

易二語以一靜一動對言此是以知行之效驗對言  
能靜雖亦是未應事之前然上承志有定向說下來  
則不可謂之寂然不動矣若寂然不動又豈可以志  
言哉志則心有所之矣謂之寂然不動可乎然則此

定靜字只是理明之後外物私意皆不足以搖奪之而心自不妄動耳非對感通言之靜也

叢說定靜安以知言慮得以行言

定靜安是未有事之前慮是方應事之時得是事既應之後慮雖屬處事而未可便以慮為行力行正在慮得之間蓋此五者是說功效次第則能慮不是行之功效分曉只當與定靜安皆為知之功効方是

或問篇首之言明明德以新民為對則固專以自明為

言矣後段於平天下者復以明明德言之則似新民之事亦在其中何其言之不一而辯之不明邪曰篇首三言者大學之綱領也而以其實主對待先後次第言之則明明德者又三言之綱領也至此後段然後極其體用之全而一言以舉之以見天下雖大而吾心之體無不該事物雖多而吾心之用無不貫蓋必析之有以極其精而不亂然後合之有以盡其大而無餘此又立言之序也 饒氏輯講問此段最為可疑如言似新民之

事亦在其中却言自明已德於天下却不是使天下之人皆明其明德也又如言極其體用之全則似指明德為體新民為用此又似有礙至如天下雖大而吾心之體無不該事物雖多而吾心之用無不貫其言又似乎明已德於天下與前章句或問意相反不知何謂嘗看舊本或問前段明明德於天下處云自明其明德而推以及於天下今此段似與相著或恐是朱先生改正之時偶遺忘及此亦未可知

或問之意是合在人在己之明德以為一而言其體用耳蓋明明德於天下固是治天下者使天下之人皆有以明其明德然天下舉其全若國若家若身心以上皆已該於其中總言明明德於天下則自治國齊家以至於致知格物皆在其中矣非只平天下於外而小之為國家內之為身心究其極之為意為知為物皆不用其力也蓋舉大則小無不該然欲致力於其大則當於其中先致力於其小以為之本耳故

言明明德於天下則固為新民之極功然明明德之事亦未嘗不該於其中使天下之人皆有以明其明德四海九州之人固天下之人一國一家之人與使者之自身亦莫非天下之人也已欲明其明德固當格物以致其知誠意正心以修其身欲家國天下之人各明其明德亦不過使之皆如此而已曰極體用之全而一言以舉之者體即明在己之明德用即使人各明其明德也一言而脩己治人之事無不在非

極其體用之全而何哉曰天下雖大吾心之體無不該者自有以明其明德而新民之體已立天下雖大體亦何所不該乎曰事物雖多吾心之用無不貫者使人各明其明德而吾明明德之用乃行事物雖多用亦何所不貫乎如此則以明明德為體新民為用豈不是經註或問本意而雙峰過疑之耶雙峰蓋以經註所言專為平天下之事自治國以上皆未之及故如此見可謂誤矣但以為明己之明德於天下則

本非朱子之意乃雙峰因誤致誤耳餘見後段

發明輯釋引盧氏解或問

見前段

之言曰言明明德與新

民對則大學之體用猶二也言明明德於天下則大學之體用非二矣吾心之體即明德之虛而具衆理者也吾心之用即明德之靈而應萬事者也能析之極其精而不亂則知吾心之用無不貫矣能合之盡其大而無餘則知吾心之體無不該矣不析而遽欲合之則有虛空恍惚之病徒析之而不能合之則有支離破碎之病



此二句其意無窮真西山嘗誦而繼之曰小德川流大德敦化又繼之曰吾道一以貫之其旨深矣

竊意體即明德用即新民極體用之全而一言以舉之者即明明德於天下一句而脩己治人之事無不該於其中也觀於或問前段之言曰所謂明明德於天下者自明其明德而推以新民使天下之人皆有以明其明德也之言可見天下雖大吾心之體無不該者自明其明德所以立新民之體體固無不該也

事物雖多而吾心之用無不貫者推以新民使人各明其明德所以達明明德之用用固無不貫也析之極其精而不亂者篇首明明德以新民為對分體用而言則明明德固專以自明為言也合之有以盡其大而無餘後段於平天下復以明明德言之合體用而言該自新新民於一句之內也此二句正是答或者所問前後不同之意處熟讀可見或疑如此說體用似於心之體心之用六字意有未瑩如何曰天下

事物未有不統攝於一心者是故以明明德為體非  
心則德不能以自明體不能以自立心之體所以該  
天下之大者蓋如此以新民為用非心則民不能以  
自新用不能以自行心之用所以貫事物之多者蓋  
如此盧氏所解則專以明明德為自明之事而分其  
體用故但知虛具衆理者之為體而不知不明乎德  
則無以全此體但知靈應萬事者之為用而不知不  
新乎民則無所措其用蓋亦未達經注此句該盡人

已之意而但以明明德於天下為明已之明德於天下者不唯不足以別白此段問答之曲折又恐正墮前段雙峰似乎明已德於天下之疑讀者其試思之

章句

或問所以釋明明德於天下者詳略不同如何

曰章句所以訓釋經文之義或問所以敷暢章句之旨豈有二哉夫章句明明德於天下之訓釋可謂至矣但恐讀者不察易於使字上致疑往往謂平天下是治人之事今日使天下之人皆有以明

其明德似乎治人者使所治之人如此則此句不  
可以該自明之意故或問於章句此句之上再加  
自明其明德而推以新民一句以見自明新民皆  
所謂使天下之人有以明其明德也然後經文明  
明德於天下之一言可以為極體用之全而舉之  
耳蓋此使字只是活字只當輕看不必以在已使  
人為拘蘓秦曰使我有負郭田二頃蕭道成曰使  
我治天下十年大學傳之十章章句曰使彼我之

間各得分願此三使字亦何嘗以在己使人為拘

哉

看得使字之義活則章句或問之旨曉然矣

發明本當云古之欲平天下者今乃以明明德於天下代之者以明明德人已所同得明明德於吾身體也明明德於天下者新天下之民使皆明其明德也用也一言而該大學之體用者在此

發明此說雖似得之但先言明明德於吾身而後言明明德於天下則似乎明明德於吾身一句是解篇

首在明明德之義明明德於天下以下三句是解後  
段此句之義如此則後段此句只是新民之事只是  
用與或問極體用之全一言以舉之之意不相似觀  
於或問先提起所謂明明德於天下者一句然後從  
而釋之曰自明其明德而推以新民使天下之人皆  
有以明其明德也立言之序如此則自明新民皆該  
在此句之中異乎發明之意矣

叢說明明德於天下此德字已含明字意在內明德二

字已該明明德三字義了上一明字是新民新字之意  
明明德猶曰明明明德相似與在明明德不同故章句  
曰使天下之人皆有以明其明德使字便是上明字意  
此亦不違或問之意而以明明德於天下為專指新  
民而言不知其該體用故耳其所謂猶曰明明明德  
相似與使字便是上明字意之言皆不得經注之旨  
而肆為臆說者也讀者知或問極其體用之全而一  
言以舉之之旨則叢說之誤不待辨而明矣已上四



條饒氏則專以明明德於天下為新民之事而反非  
或問之可疑盧氏則專以為明己之明德於天下而  
失或問之旨發明叢說則皆祖饒說指此句為新民  
之事又為章句或問所礙而說得如此朦朧信乎說  
書之難也又未知愚意能合經註或問之旨否也姑  
錄於此以俟知道而就正焉

致知在格物 通曰章句釋明明德兼事與理釋至善  
釋格物亦曰事理窮致事物之理心外無理理外無事

即事以窮理明明德第一工夫也故不曰欲致其知先格其物而曰致知在格物此一在字又與章首三在字相應大學綱領所在莫先於在明明德而明明德工夫所在又莫先於在格物

陳公潜先生云致知在格物何嘗是明明德工夫所在後面一在字與三綱領三个在字各有所指何嘗相應而通不顧經文摘撮附會惑人甚矣愚謂經言大學之道在於三綱領耳何嘗謂三者是綱領所在

哉致知在格物亦曰推極吾之知識在窮致事物之理耳所以不曰欲曰先者蓋格物之外別無致知工夫致知工夫即在於格物之內程子所謂物我一理纔明彼即曉此合內外之道者是已朱子所謂明明德工夫莫先於在格物哉讀者其試思之

意誠而后心正章句意既實則心可得而正矣 通意既實則心之用可得而正

正心該體用動靜觀於或問鑑空衡平之體鑑空衡

平之用之言可見通乃於此添一用字其意蓋謂心之體無不正所謂正心者正其心之用爾其實非經旨也當於第七章辯之

傳之首章 饒氏謂此章姑以釋明明德之義未有下工夫處

此蓋欲歸重於止至善章而言也但明明德工夫全在格物致知脩身五條目上明明德是五條目之綱領五條目之外別無明明德工夫故此章但釋明明

德之義如此而下工夫處却詳具於五條目之傳非有他也

傳之二章盤銘日新發明愚案日新之蘊自仲虺發之湯采之為此銘 輯釋亦引此說

湯銘盤虺作誥其先後似難臆度

是故君子無所不用其極章句自新新民皆欲止於至善也 饒氏謂極與至善二義不同此極字是以窮盡無去處為極 云 若至善之至則是以無過不及為至

非窮極之義也又謂止於至善是逐事逐物各要止於至善無所不用其極是無一事一物不止於至善止於至善是逐一事說是下手處無所不用其極是該全體說是成就處

按經中章句云至善謂事理當然之極與此傳文用其極二極字皆只是隨事指其十分盡善處為極皆非指衆事之窮盡處為極也自在止於至善處言之則凡事皆有善處善皆以十分盡處為至十分盡處

非極而何又自用其極觀之則此極字之義亦不過如此而已初未見其指窮盡無去處而言也必連上文無所不三字說下來方見得窮盡無去處之意耳

極便是至善用其極便是止於至善故曰未見窮盡處直至曰無所不用其極方是自新民皆止於至善故曰必連上文無所不三字說下來方是得窮盡無去處之意也

雙峰因誤看了此

極字之義遂謂經中章句極字之義亦如此也可謂因誤致誤朱子嘗曰理有未明而不盡乎人言之意真雙峰之謂矣

饒氏又曰此章姑以釋新民之義亦未下工夫處

此與論首章之意同推彼可以明此矣

傳之三章穆穆文王

云

饒氏謂但曰止於仁止於孝

而不曰止於至仁至孝以此見至善只是事物上一個無過不及底道理非窮高極厚之謂

仁敬孝慈信便是為君臣子父與人交者之至善若更曰至仁至孝則又似乎言止於至至善然者豈不重複矣乎若曰仁非至仁孝非至孝則仁孝不必十



分仁孝已是至善若十分仁孝則又過於中而反不得為至善耶如此則雙峰不唯不識至字之義亦未識中字之義也蓋十分盡善方可謂至方是無過不及所在若善未至於十分便是不及乎中又何可以言至乎雙峰每慮其過則仁孝皆不敢做到十分盡處便自以為至便自以為中天下還有此理否殊不思但言止於仁孝何嘗不要人十分仁孝觀其引文王為法可見文王仁孝豈有不十分全盡者耶只因

雙峰平日以聖賢自居顧經註之旨已皆有所未至  
慮世人以此覘其虛實故每將經旨說降一等求以  
自便故不得不誣朱子以欺世耳噫

瑟僂章句瑟嚴密之貌僂武毅之貌 發明嚴密在心  
武毅見於色

按傳釋瑟僂為恂慄章句又解恂慄為戰懼下文又  
以恂慄為德為裏則所謂武毅者似未可指為見於  
色也語錄云僂武毅貌能剛強卓立不如此怠惰闌

颯詳此似亦當以在心言者未知然否

親賢樂利 饒氏謂親賢樂利於此見君子小人分量  
不同所得各有淺深所謂新民之止於至善者非是要  
使人人為聖為賢只如農安畝工安肆商安塗賈安市  
亦是新民之止於至善處

如此則比屋可封之俗人人有士君子之行皆無實  
之空言後世如文景太宗之粗可少康者皆足以為  
新民極功而可與唐虞三代比隆矣況安畝安塗與

為聖為賢並行不背可也若但安畝安塗而不孝不悌悖理傷教不知可以為新民之止於至善否唐虞三代之民而有是哉愚謂雙峰每將經旨說降一等亦此類也識者宜必有見於此

饒氏謂明德新民兩章釋得甚略又但言明新而不言所以明新之方此章所釋節目既詳工夫又備可見篇首三句重在此一句上輯釋諸篇皆引之

篇首三句重在此一句上是固不為無理但言上二

章工夫皆在此一章則非也蓋前兩章不言所以明  
新之方者明新之方自具於後六章釋條目工夫處  
非有他也若至善章所以詳於前二章而必貫明德  
新民二事言者蓋至善不是懸空物事不過只是明  
明德新民所當止之地耳故此章必貫明明德新民  
言之明德新民工夫既具於後六章之傳則前二章  
不容不簡至善雖便是明明德新民之所當止然其  
意則只寓於條目工夫中更無他處可以再詳其義

故此章自不容不詳言至善之義以示人初非以前  
二章未言明新之方故如此詳言以補之也蓋綱領  
雖三事不過二非明德新民之外他有止至善之事  
也故釋明德新民則止至善之意寓如曰無所不用  
其極是也釋止至善則明德新民之義存如引淇澳  
烈文之詩是也然亦不過皆言其概而已若謂明新  
之方盡具於是則切磋琢磨猶可指為明之之工夫親  
賢樂利何以見得新之之工夫耶

章內五節次序 通發明輯釋引盧氏曰云云 第三節  
言聖人之止皆至善以得所止言云云

按此節章句其末曰則於天下之事皆有以知其所  
止而無疑矣則朱子正以此節為知所止之事蓋章  
句是就學者分上言盧氏是就文王分上言所以不  
同要之文王之所已行正是學者之所當知然則但  
當以章句為是

傳之四章釋本末或問然則其不論夫終始何也曰古

人釋經取其大畧未必如是之屑屑也目此章之下有闕文焉又安知其非本有而并失之也耶

愚聞之章清所先生曰大學諸傳釋工夫而不釋效驗觀於知止能得與物格至天下平無傳可見蓋效驗只在工夫之中也知止為始能得為終終始正是以效驗言所以無傳固非屑屑不及釋亦非本有而并失之

傳之五章饒氏謂朱子補傳似乎說得太汗漫學者未



免望洋而驚如既謂即凡天下之物則其為物不勝其  
多又謂因見其已知之理而益窮之以求至乎其極不  
知又何處是極表裏精粗全體大用亦是自立此八字經傳  
中元無此意

按即凡天下之物非謂把天下之物一齊格了亦曰  
就凡衆物之中隨其所用而逐件格之耳求至乎極  
亦非謂求至乎凡物衆多之極亦只是求至此一物  
義理之盡處耳此方說就一物上如此格也夫方就

一物上格而曰即凡天下之物者蓋凡物莫非天下之物皆學者所當格者然不可限定說先格某一物次格某一物則拘矣或難或易或緩或急各隨人淺深就所遇者則格之即字凡字是朱子用意淺深處曰即則只就一物曰凡則不拘何物即凡天下之物圓活而無所拘之辭非親用功窮格者不能如此下語也然則自此以上且是說就一物上格明矣直至下文用力之久一旦豁然貫通衆物之表裏精粗無

不到處方是合衆物之全而言以文勢詳之可見雙峰不詳下文有衆物二字遽以前節極字為事物當然之極真所謂理有未明不盡乎人言之意者也此其說極字之誤正與前說至善處極字之誤同知彼則知此矣表裏精粗全體大用八字固是朱子之所自立然豈不切於格物致知之義耶朱子本不效傳體行文其所補之文便只如章句一般又何必以經傳所無而疵之乎至於汗漫望洋之疑則大學之道

是教人學至乎聖人之方法格物致知一章正所謂  
始條理之事始全則終亦全始偏則終亦偏觀於孟  
子論始終條理處可見道有定體教有成法卑不可  
抗高不可貶奈何患學者之不能而欲自貶以徇之  
乎況望洋之疑只因雙峰誤看極字之所致他人看  
得極字之義分曉又安有望洋之驚哉

語錄問先生所補致知章何不效其文體曰亦嘗效而  
為之竟不能成

竊意效傳體行文特文公餘事決無效不能成之理  
此特姑為謙辭以答學者之問耳正意恐不止此也  
蓋若效其文體則必援引經傳文意簡古學者未必  
自能通曉須又為之註解以曉之如此則自為自註  
豈得不為好事者之所譏誚故不求其文之類但取  
其義之明所補傳文便只如章句一般庶乎人之易  
曉耳不知識者以為然否

饒氏曰愚謂大學之要只在止於至善上格物是隨事

隨物每每要窮究到至善處致知是要推致其知識使之知此至善不必別為之說

朱子之意何嘗以格致不是要知此至善但理是事物之實理至善又是狀此實理之體段說至善不如說理之實耳只因饒氏看得至善之至字有礙又疑補傳之太汗漫故如此見耳要之以致知為知至善朱子與雙峰無異觀於章句物格知至則知所止矣之言可見但雙峰以至善之至專為無過不及之意

而非極至之義與朱子不同故於此亦不合耳汗漫之疑殆亦起此讀者其試思之

饒氏謂或問云聖人說教使人默識此心之靈而存之於端莊靜一之中以為窮理之本謂聖人設教使之如此求之經傳却無證據看或問所引只以中庸尊德性而道問學為證然德性是說心之理靈是說心之知覺有些不同况道問學是兼知行言此却是專指致知而言似亦未甚親切

竊意古者八歲入小學使之收其放心養其德性以  
為大學之基本此豈非聖人設教使之如此似不必  
他求經傳以為證據也按或問前段有曰聖人於其  
始教為之小學而使之習其誠敬則所以收其放心  
養其德性者已無所不用其至矣及其進乎大學則  
又使之即夫事物之中因其所知之理推而究之以  
各到乎其極則吾之知識亦得以周徧精切而無不  
盡也又按語錄問格物補亡處不入敬意何也曰敬



已就小學處說了此處只據本章直說不入雜在這裏壓重了不淨潔詳此二說則朱子所據之意可見靈字只說知覺之疑後第七章心不在焉處與孟子牛山之木章詳之道問學兼知行之說當於中庸辯之此不及贅

補亡 通人心之靈莫不有知此良知之知得於天性理有未明知有未盡此致知之知得於學力

知只一緻得於學力者即所以復其得於天性者耳

分良知與致知而言然則得於天性之外又他有得於學力之知果由外鑠我耶

或問取程子格物致知之說十二條朱子取其意以為

補傳

通謂補傳自所謂致知在格物者至故其知有

不盡也是取程子第一條意

程子曰致盡也格至也凡有一物必有一理窮而至

之所謂格物者也然而格物亦非一端或讀書講明道義或論古今人物而別其是非或應事接物而處其當

谷皆窮理也

是以大學始教是取程子前二條意

程子曰學莫先於致

知又曰誠敬固不可不勉然天下之理不先知之亦未能有勉而行之者也自必使學者至

以求至乎其極是取程子第五

程子曰格物非欲盡窮天下之物但於一事上

窮盡其他可以類推至於言孝則當求其所以為孝者如何若一事上窮不得且別窮一事或先其易者或先其難者各隨人淺深譬如千蹊萬逕皆可以適國但得一道而入則可以類推而通其餘矣蓋萬物各具一理而萬理同出一原此

第六

程子曰物必有理皆所當窮所以可推而無不通也

所以幽顯是也若曰天吾知其高而已矣地吾知其深而已矣則是已然之辭又何理之可窮哉

第七

程子曰如欲為孝則當知其所以為孝之道如何而為奉養之宜如何而為溫清之節莫不窮究然後能之非獨守夫孝之一字而可得也

第八條意

程子曰物我一理纔明彼即曉此合內外之道也語其大

天地之所以高厚語其小至一物之所以然皆學者所宜致思也或曰先求之四端可乎曰求之性情固切終

身然一草一木亦皆有理不可不察至於用力之久而一旦豁然貫通焉

是取程子第二

程子曰今日格一物明日又格一物積習既多然後脫然有貫通處爾第

三

程子曰一身之中以至萬物之理會得多自當脫然有箇覺處

第四條之意

程子曰窮

理者非謂必盡窮天下之理又非謂止窮得一理便到但積累多後自然脫然有悟處

自衆物之

表裏精粗至

此謂知之至也是取程子第九

程子曰致知之要當

知至善之所在如父止於慈子止於孝之類若不務此而徒欲泛然以觀萬物之理則吾恐其如大軍之遊騎出速而而無所歸也第十條之意也

程子曰格物莫若察之於身具得之尤切

愚按通謂補傳自起首至故其知有不盡也是取程

子第一條意是以大學始教是取程子第二條意自  
必使學者至求至乎其極是取程子第六第七條意  
者皆是矣謂必使學者至求至乎其極是取程子第  
五條八條之意至於用力之久而一旦豁然貫通是  
取程子第二第三第四條之意者皆得之而未盡謂  
末後四句是取程子第九第十之之意則全失之何  
則補傳凡三節第一節自起首至窮其理也是說致  
知在乎格物下文至故其知有不盡也是說物未格

則知不盡第二節自是以大學始教至求至乎其極是就逐物上說格物致知工夫第三節是承上節就衆物上說物格致知效驗程子十二條前二條與第一第六第七條皆說工夫如通言可也第八條是說衆物上用工夫不可不周通但以為全是補傳第二節所取則有所未盡第九第十條是說衆物上用工夫又不可泛然無序正是說工夫處通乃以為是補傳第三節後四句所取則此四句正是說效驗處而以為

有取於彼是不察工夫之效驗之有辯也愚則以為此

三條

八九十

補傳中凡說工夫處如前二節與第三

節用力之久一句皆在所取耳第二第三第四第五

此四條是合工夫效驗言者其實是補傳全章之所  
通取初不分節以配之也通以為第五條是補傳第

二節所取殊不思可推而無不通一句何嘗不就衆

物上說貫通之理耶通又以為第二第三第四條是

補傳第三節起頭二句所取殊不思今日格一物明

日格一物與自一身以至萬物之理及非謂必盡窮天下之理又非謂止窮得一理便到等語又何嘗不是說就一物上窮格以至於積累之多正是通謂格致工夫之始終處而通皆指為二句所取可乎況補傳第三節末後四句正是承豁然貫通之意而言格致之效驗處如此則第二至第五條所謂貫通處覺處悟處與無不通之言是補傳第三節六句之所通取通乃獨以起頭二句當前三條之意後四句既曰



不取此意則只得以第九第十條當之而不思二者有工夫效驗之不同可謂誤矣或問取此十條自有次第第一條說格致用功之法最為詳備是就逐一物上說故居首第二第三第四第五條皆通說工夫效驗之始終是就逐物上說至衆物上故次之第六第七條皆說就逐一物上當窮到極至處是申第一條之意故又次之第八條說衆物格之不可不周第九第十條皆說衆物之中格之又當有先後緩急之

序三條皆是申第二至第五條之意故以是終焉大抵說工夫處多說效驗處少有只說工夫而不說效驗處無只說效驗而不說工夫處通不察其次序之精密如此乃雜然取以配之於說工夫處亦取五條意於說效驗處亦取五條意宜乎其致誤也讀者詳之

鉅堂董氏槐以經文自知止而後有定至則近道矣九句合傳之四章及五章結句共為一章是釋格物致知

之傳朱子不當更作補亡

按經文自明明德以下三句是一節說工夫自知止  
而后有定以下五句是一節說效驗自物有本末以  
下四句是一節總結前二節之意此皆是以大學綱  
領言之者自古之欲明明德於天下至致知在格物  
一節是逆推工夫之所始自物格至天下平一節是  
順序效驗之所極末後二節是結前兩節之意前節  
正說結工夫後節反說結效驗此皆是以大學條目

言之者其前後次序秩然不可紊亂如此今若掇此九句以為格知之傳則綱領但說工夫不說效驗又無結意與後段說條目處不同矣況諸傳之體說工夫處多說效驗處少有只說工夫而不說效驗者無只說效驗而不說工夫者蓋以無工夫則無效驗效驗不在工夫外也況格物為大學始教之事而不詳言其工夫可乎今以經文九句推之則定靜安慮得五字不可謂之工夫明矣知止之知亦已知所止而

非用工夫求知所止之謂物有本末事有終始亦但言事物大概如此知所先後則近道矣亦不過欲知本末終始所當先後之序庶乎可至於道不遠而已亦不見格之致之所用之工夫當何如也更以第四章傳文推之亦不過但言聽訟無訟之輕重欲人知明德之為本而已初未見欲知明明德新民之理則當如何下工夫也遽以為物格遽以為知之至可乎董氏但見經傳二處有此幾箇知字便欲牽合以為格物

致知之傳而不知致之格之之工夫不止如此也觀  
於中庸以學問思辨為擇善之事而皆屬乎知說知  
如彼其詳則格致之傳必如補亡之言而後盡董氏  
蓋不足以知此也

傳之六章故君子必慎其獨也章句然其實與不實蓋  
有他人所不及知而已獨知之者故必謹之於此以審  
其幾焉 饒氏謂謹獨只是審其善惡之幾而去取之  
如此則不自欺而自慊矣章句謹獨是審其實與不實

之幾

詳章句之意此是指獨字而言幾是指好善惡惡之意而言審是審其幾之實與不實審其幾之實與不實即是審其好善惡惡之意能如好好色惡惡臭之實與否也雙峰以為章句是審其實與不實之幾似未得章句之旨章句特欲審其幾之實與不實爾至其自謂只是審其善惡之幾而不及好之惡之之意又似與獨字之意無相關者不知如何

饒氏謂誠意正心修身不是三事且如顏子問仁而夫子告以非禮勿視聽言動矇要只在四箇勿字上仁屬心視聽言動屬身勿與不勿屬意若能勿時則身之視聽言動便合禮而此心之仁即存以此見三事只是一串

引四勿為證是矣但經言意誠而后心正心正而后身修雙峰謂若能勿時則身之視聽言動便合禮而此心之仁即存則又似乎意識而后身修身修而后



心正者恐不可得而強合要之章合附會之言自不能無罅隙亦不足深辯也

輯講問傳之諸章釋八條目處每章皆連兩事言獨此章單舉誠其意是如何饒氏曰致知屬知誠意屬行知行畢竟是兩件事當各用其力所以誠意不連致知說誠意不特為正心之要自修身至平天下皆以此為要若只連正心說則其意局狹無以見其功用之廣通引金氏曰大學諸章之傳首辭結語皆以序言自正心

以上獨不以序言蓋心身家國天下各是一節之事而致知誠意二者同為心上之事心統知意者也若亦以序言則是一心之中文自截作三節而心上工夫却自分成三次豈理也耶然皆以序言於經經傳固互相發也通曰大學條目有八僅作六傳格物致知兩者實是一事故統作一傳自正心以下五者工夫次第相接故統作四傳惟誠意獨作一傳然章句謂誠意者自修之首亦已兼正心修身而言矣章末曰潤身曰心廣提

出身與心二字意亦可見 輯釋亦引饒氏與通之說  
詳此三說皆不過因誠意自為一章與前後五章皆  
兼二事釋者義例不同故如此見耳饒氏知行當各  
用其力之言似矣竊意知行當各用其力孰與脩已  
治人之當各用其力耶今傳之八章釋脩身齊家且  
以脩已治人之事合而言之然則以致知合誠意為  
一章又何為不可哉饒氏此言恐未必然也若誠意  
不獨為正心之要者恐亦未必然當於後章辯之金

氏知意皆統於心心上工夫不可截作三次之言亦是自立此說以經文論條目之工夫效驗處皆相因為序之意推之何嘗無三節工夫耶且果如饒氏金氏之說則經文之次序皆不若傳文之當耶金氏亦既自知之矣通者援章句自脩之首四字以合於饒氏誠意不特為正心之要之說亦似矣殊不思饒氏何嘗以朱子之說為是耶觀其謂首字不若要字之言可見章末潤身心廣之證亦本饒氏皆未得為的

論也獨通者格物致知兩者實是一事故統作一傳之言近之惜其不能推此以究其義也愚嘗以為傳自五章釋八條目八條目之中格物致知只是一事故經不曰欲致其知者先格物而曰致知在格物便見此二條目與正心修身修身齊家齊家治國治國平天下二事相因者不同格物即所以致知所謂纔明彼即曉此此合内外之道是已然則第五章釋格物致知與第六章釋誠意皆是一章釋一事所以然

者以二事用功之不易也章句曰第五章乃明善之  
要第六章乃誠身之本詳此則二章皆是一章釋一  
事之意可見語錄以第五章為夢覺關第六章為人  
鬼關又為善惡關詳此則此二事用功皆不易之意  
又可見矣自正心以至於平天下皆一章兼二事釋  
者以物既格知既至意既誠之後循序漸進用功為  
易耳語錄以為過此兩關

夢覺  
人鬼

上面工夫一節易如

一節了詳此則自正心以至於平天下用功為易者

信矣然則六章之傳釋條目者前二章皆一章專釋一事以其難也後四章皆一章兼釋二事以其易也下過如此而已不知識者以為然否

章句誠其意者自修之首也 饒氏謂首字不若要字言修身正心其要只在誠意意既誠則心自正身自修又謂誠意正心脩身不是三事 云云 三事只是一串又謂誠意之外別無正心修身工夫

首字不若要字之說正如中庸鬼神章包字不若貫

字之說要字貫字自是雙峰意如何亦欲朱子從之  
雙峰意既誠則心自正身自修與誠意正心脩身不  
是三事三事只是一串及誠意外別無正心脩身工  
夫之說辯則辯矣新則新矣其如經文欲脩其身者  
先正其心欲正其心者先誠其意與意識而后心正  
心正而后身脩這數句何經文明有三節工夫而雙  
峰強說誠意外別無正心脩身工夫經文明說而后  
心正而后身脩雙峰強說意既誠則心自正身自脩



然則經何以不曰意識而后心正身脩欲脩身正心者先誠其意耶經文分明分別作三事如此而雙峰強以為不是三事只是一串何耶朱子嘗言序之不可亂功之不可闕如雙峰說則序皆可亂功皆可闕矣雙峰勇於背朱子而不思經文之序本不可亂經文之功本不可闕非朱子創為之說也以經證傳以傳釋經則雙峰之謬誤不難見矣

小人閒居為不善 通謂傳末長國家而務財用之小

人即此閒居為不善之小人也 輯釋亦引此說

小人固無二小人但此二章所言一為自脩者之戒  
一為用人者之戒以為彼小人即此小人則非傳者  
之意也

傳之七章心有所忿懣恐懼好樂憂患則不得其正章  
句蓋是四者皆心之用而人所不能無者然一有之而  
不能察則欲動情勝而其用之所行或不能不失其正  
矣饒氏謂忿者怒之暴懣者怒之留恐懼好樂憂患與

忿懣為類蓋亦指其情之偏重者而言也問章句謂是四者皆心之用而人所不能無如何饒氏曰忿懣是不好底因此一件則知下面三件皆指不好底說

按章句云忿懣怒也夫怒所當怒亦未可便謂之不好唯雙峰以怒之暴怒之留釋之然後二字乃不好耳愚嘗徧考字書並無以暴留之意釋忿懣之義者然則雙峰暴字留字之意得非本語錄忿又重於怒與忿懣是怒之甚者二句而言乎然暴留二字與甚

重二字之義不同重與甚是因事有可怒之甚者怒之不得不重未害其為心之用也若暴則必至於虐物留則滯而不化皆過其則而不中其節非所宜有也雙峰若別無所據但因語錄而推之如此則不若但依章句平說為怒之得也蓋是四者皆心之用今因說忿懣一事作不好而并與恐懼好樂憂患三者皆以為不好底而又不能明言三者所以不好如忿懣二字之故則何以使讀者之無疑哉豈若朱子只

輕說忿懣則四者皆不能無但不可有之於心之為  
得乎況傳文不但曰有忿懣等而必曰有所以有所  
二字觀之則章句之旨似無可疑又按金氏祖饒氏  
意併以恐懼好樂憂患三者皆連二字言之為不好  
之證通亦從而和之然則中庸恐懼不聞孟子生於  
憂患亦連二字言之則何以分別其好不好耶

語錄大學七章看有所二字有所憂患憂患是合當有  
若因此一事而在胸中便是有有所忿懣因人之有罪

而撻之纔撻了其心便平是不有若此心常又不平便是有恐懼好樂亦然

按七章四言有所八章五言之其所所之一字皆是  
指物之辭蓋人之一心未有事之前事已過之後皆  
當湛然虛明則不滯於一隅不偏於一事所以事至  
物來隨感而應無有不得其正者矣今乃於未有事  
之前或事既過之後其實未有事之前又是前一件事既過之後非有二也而  
有所忿懣等焉則是滯於一隅偏於一事當虛不虛

當無而有而心之本體自有所慮矣宜乎及有當應之事以此先有所主之心應之鮮有不失其正者也故語錄云有所字正指所憂患之事所忿懣之物而言以其滯而不化不當有而有故皆以有所言之耳心不在焉視而不見聽而不聞食而不知其味章句心有存則無以檢其身是以君子必察乎此而敬以直之然後此心常存而身無不脩也 饒氏謂此以心不在明心不正之害心不在未便是心不正視不見聽不聞食

不知味未便是身不修傳者欲借粗以明精心不在則  
無知覺以為一身之主宰而視不見聽不聞食不知味  
矣況心不正則無義理以為一身之主宰亦何以視所  
當視聽所當聽食所當食而無不脩乎 輯釋諸編皆

引此說

按語錄問心不在只是說知覺之心却不及義理之  
心曰纔知覺義理便在此纔昏便不見了此言可謂  
至矣讀者更以孟子告子上篇牛山之木章語錄及



中庸章句序之意參之

愚已於孟子備述之

則朱子之意顯然

可見矣況在之為正訓雖殊而歸則一朱子於孟子  
求放心處以昏昧放逸為言昏昧是知覺上說放逸  
是就義理上說昏昧則失其知覺而無以為燭理之  
本放逸則徇物於外而不能為應事之主必兼此四  
字而後可以盡心不在之義而心不正者亦不外是  
矣饒氏以釋氏常惺惺為心在而不正之證則是但  
以昏昧為不在而不知放逸之乃所以為不在也泛

而觀之昏昧放逸雖若二事合而言之則未嘗不相  
關也何則知覺雖不昏昧然苟為不在理義之中則  
一有可徇之欲必將徇之以放逸於外而嚮所謂知  
覺之不昏昧者亦不過但能不昧於所徇之欲而於  
其他當應之事反昏昧而不知矣謂之在可乎蓋嘗  
合朱饒之說而觀之則知雙峰但以知覺不昧為在  
却以義理無失為正如此則正與在為二而正又在  
乎在之外雖不正亦可以為在矣殊不知義理有失

便是徇物放逸於外又可以為在乎朱子則以知覺既不昏昧又能居中役物嘗在義理之中而不徇物以放逸於外者為在如此則在外無正不正不足以言在矣姑以世人心言之彼其喻於利者雖刀錐之末亦皆毫分縷析無有或遺如此者不可謂其知覺之不在也然心不能以役物反為物所役不免逐物於外謂之在可乎雙峰惑於知覺不昧之似乎在而許之乃不察其不免逐物於外之實不可以言在

也遂疑在與正之有二母乃未好樂憂患焉則如鑑  
未照而先已不空衡未稱而先已不平矣豈非體有  
所累而失其正乎所以至有當應之事以此先有所  
主之心以應之或當怒者倍怒當喜者不喜或當恐  
者倍恐當好者不好喜怒憂恐不重即輕如鑑先不  
空以照則妍醜不得而明衡先不平以稱則輕重不  
得而定豈非用有所偏而失其正乎由此觀之則有  
所忿懣四者是心之體失其正處四言則不得其正

是心之用失其正處通不如此看而交互差失惑人甚矣讀者詳之

叢說前言心不正是心雖在此所應事上而情之用不當或以怒而應當喜者或以樂而應當哀者後言心不在所應事上謂身心全不相關 通引方氏曰上一節說有心者之病此一節說無心者之病上一節說心不可以有所主此一節說心不可無所主不可有者私主也不可無者存主也心在則羣妄自然退聽心若不存一

身便無所主宰然則中虛而有主宰者正心之藥方也  
按二說極當深可以破饒氏之謬故錄之以備參攷  
饒氏謂七章章句章句註文似可省

按饒氏自謂正心修身二章工夫皆在誠意章故如  
此說然經言欲正其心者先誠其意意識而后心正  
故與章句之意無異章句自援經文以貫傳義甚為  
的當饒氏奈何欲教玉人雕琢玉而省此不可省乎  
傳之八章 饒氏謂此皆是說尋常人有此病痛似不

必將傲慢傲合當有底

因教憤而廢親愛等四者與說忿懣不好之意同知彼則知此矣但雙峰此段議論極詳大抵皆是諸子之所已破讀者攷之或問語錄足矣正不在於後學之有辯也

章句之猶於也 饒氏謂之者心之所之也是向之意本不可訓於但於於字相近故曰猶於也

雙峰惟如此說之字故以五者皆不可有竊意若改

而辟焉之而字為則字乃可如此說耳

饒氏謂七章言心有所忿懣等則不得其正而不言所以正之之道八章言人之其所親愛等則流於辟而不言所以脩之之方夫有是病必有是藥今詳此二章詳於論證而畧於處方蓋心與身一物也而心為之主意與心一事也而意為之機故傳釋誠意一章首之以毋自欺申之以謹獨以明用功之要莫切於此故終之曰德潤身心廣體胖故君子必誠其意所以著意誠則心



正身脩之要也雖然不特正心脩身為然由是而齊家  
治國平天下無往而不自慎獨出也故齊家治國章曰  
心誠求之平天下章曰必忠信以得之曰誠求曰忠信  
皆誠意慎獨之意也 輯釋亦引此意

有心術之病有事為之失心術之病惡也先儒所謂  
縱有善亦是黑地上一點白是也事為之失過也先  
儒所謂縱未有善亦是白地上一點黑是也然則意  
不誠則好善不如好好色惡惡不如惡惡臭甚則至

如小人陰惡陽善者之所為此蓋心術中之病非過也  
惡也惡則治之也難故必毋自欺必慎其獨而後意  
可得而誠不然則陷於小人之域矣然意既誠矣固  
無為惡之事然於善之中未可保其無所偏無所辟  
也此所以雖曰實好善實惡惡至於心之應事猶或  
至於有所忿懣等而不得其正者亦有心雖已正至  
於身之接物猶或至於之其所親愛等而辟焉者然  
雖未免有所偏僻亦不過於善之中有偏僻耳無所

謂惡也然不謂之過則不可過則改之而已所以知其偏則使之不至於偏知其辟則不可使之辟足矣無所偏辟則善之至矣又何方之可處哉蓋大學之教必須逐節用工夫隨地致力不可謂意既誠則心自正身自脩誠意之外他無正心脩身工夫而混然不為之界限也若果如所說則大學只列六條目足矣又何必虛設正心脩身二條目於其間而實無所用之功哉心廣體胖自是形容德潤身之氣象蓋意

誠則真惡惡實有善而可以言德矣亦所以明誠意  
為自修之首之意非謂工夫止於如此也但誠意正  
心脩身三者折而言之則自當有序合而驗之却不  
可以為截然不相入故日用之間念慮之萌動處便  
須審其實與不實此便屬之誠意心之與事應處便  
須審其正與不正此便屬之正心身之與物接處便  
須審其辟與不辟此便屬之脩身其工夫並行而不  
可偏廢有似於無二致耳實則界限不相侵越而不

可亂也何可因其似於無二致者遂謂慎獨一言足以盡三者之工夫而紊其不相侵越之界限哉況如其言以為自正心至平天下皆無往不出於慎獨則謂正心以下論證而不處方可也自齊家以下諸傳又何為既論證而兼處方也哉借曰誠求忠信即慎獨之意則正心脩身兩章獨不可一言及之如此乎此愚所以不能無疑於雙峰之說也雙峰之說四書通發明皆引援而祖述之故辯之不得不致其詳云

傳之九章如保赤子 語錄孝弟鮮能守而不失惟保  
赤子無有失者故特即人所易曉者以示訓與孟子孺  
子入井之意同 叢說前言孝弟慈而此獨就慈上言  
者蓋治國是上之撫下故專就愛民處言

按叢說雖於章句之旨有所未盡於語錄之論微有  
不合然亦似乎有理姑備一說竊意事親孝故忠可  
移於君若自為君者則誰為忠乎事兄弟故順可移  
於長若自為長者則誰為順乎故孝弟則專為為臣

與在下位者言之唯慈使衆可以通為君臣言之故專以此示訓耳未知然否

一家仁讓一人貪戾 饒氏謂仁讓是本上文孝弟而言仁屬孝讓屬弟貪戾是本上文慈字而言貪戾者慈之反也

孝弟是專主事親事長而言仁讓則通主待人接物而言若以為仁屬孝讓屬弟則一家之人父兄亦自在其中為父者誰為孝為兄者誰為弟乎貪戾二字

恐便是仁讓之反貪則不讓戾則不仁貪戾亦通主待人接物而言非如慈之專主慈幼言也以爲慈之

反恐亦未必然

近見盧氏亦有貪則不讓利則不仁之說乃知固有先得我心之同然者

非私言也

有諸已而后求諸人無諸已而后非諸人通引王氏曰張子所謂以責人之心責已則盡道是也

此意雖相似而所主則不同大學主治人者言張子主自治者言不可不辯也



傳之十章上恤孤而民不倍章句倍與背同

案章句不釋不倍之義說者皆以為下民不倍在上者慈幼之心而已雖亦可通竊疑孝便是老老意弟便是長長意不倍作下民不倍上心說却與恤孤之意不類文須轉摺方通不知如何

愚嘗聞之 先師冰壺鄭先生曰坊記有利祿先死者而後生者則民不倍與以此坊民民猶偕死而號無告之言鄭氏注云死者見偕其家之老弱

號呼稱寃無所告而韻書背偕倍皆同音義則不  
倍正是恤孤之意豈章句以其易曉故不釋之耶  
抑但如說者所云耶姑記所聞以俟知者

絜矩 通謂夫子十五志學即此所謂大學之道志學  
以下分知行到末節方言不踰矩是生知安行之極致  
格物以下亦分知行到末章方言絜矩是致知力行之  
極功乍看論語矩字似說得精絜矩矩字似說得粗要  
之只是一箇矩字但不踰矩矩字是體絜矩之矩是用

輯釋亦引此說

竊意論語矩字是就德上言是義此矩字是就政上言是恕義與恕要之皆是用恕乃所以為義也今以彼為體此為用似有可疑況彼章知行之分與此處分知行者不同彼處知行當於此知行上橫貫過夫子十五志學是知之始此便是於八條目一一攻究了不是只從事於格物致知二者而已也立與不惑以下皆然若以為只是一箇矩則夫子未七十時若

為政於天下猶未有絜矩之體耶觀二矩字一言不踰一言絜便見聖人學者之分若以彼為此體此為彼用恐皆鬪湊不著又以不踰矩為生知安行之極致既曰志學則下生知字不得觀集注於耳順處只說知之之至而不說生而知之可見

絜矩 通規矩皆法度之器也此獨曰矩者規圓矩方圓者動而方者止不踰矩即是明明德之止於至善絜矩即是新民之止於至善 輯釋亦引此說

陳公潛先生謂通謂矩方而止以強附於止至善之止尤為無理矩取方義不取止義也

所惡於下云云章句則身之所處云云而無不方矣

饒氏謂方字恐未安絜矩之喻取其平非取其方也

方字於矩字之義為切方則天下自平恐亦無所謂不安也

好惡通好惡二字已見誠意脩身二章特誠意是好惡其在己者脩身章推之以好惡其在人者此章又推

之以好惡天下之人者也

云云

輯釋亦引之

好惡雖只一般然三章所言各有所指傳者初無相承之意通者強合之以為說不過只是蹈襲雙峰誠意為下五者之要之言爾此皆所謂詖辭也自特誠意是好惡其在己者以下則皆所謂遁辭也雖若可通實非傳意亦不足深辯也

見賢不能舉

云云

饒氏謂過之罪小命之罪大如漢元

帝知蕭望之之賢而不能用知弘恭石顯之姦而不能

去是也

舉賢退不善二事常相因能用賢必能去不善不能去不善必不能用賢書曰用賢勿貳去邪勿疑可見二事不可分輕重若以元帝事證則其不能用望之却由其不能去恭顯况望之之死又出於恭顯之讒豈可以過之罪為小於命哉

忠信以得之 饒氏謂忠信即是慎獨以此觀之可見誠意不特為正心脩身之要而又為治國平天下之要

輯釋亦引此說

謂意既誠後下五者工夫自然易則可謂五者工夫皆不出於誠意則不可且如忠信固不可不慎獨能慎獨固能忠信但遂以忠信為慎獨則慎獨恐該忠信不盡當更詳之

君子有大道章句道謂居其位而脩己治人之術也  
饒氏謂大道乃絜矩之道

章句兼體用說饒氏只就用上言以上文先慎乎德



之意推之則章句之說有據

孟獻子 通發明輯釋皆引盧氏曰獻子嘗師子思能知義利之分故能知絜矩之道

獻子在前子思在後以為獻子嘗師子思不知何據豈傳寫之誤耶

必自小人矣 金氏曰彼為善之上下必有缺文當作彼為不善之小人與下文雖有善者亦相對 通曰誠意章曰小人閒居為不善故此章曰彼為不善之小人

前後正相對

陳公潛先生曰小人雖一般但誠意章為不能慎獨  
言之以為學者之戒此章為理財言之以為用人之  
戒初未嘗有意於相應也且朱子謂疑有缺文誤字  
正不必添一不字以強合於為不善之語也愚謂如  
金氏之言始備一說猶未甚害通但不當蹈襲而質  
言之以牽合乎誠意章小人閒居為不善之意爾此  
亦本雙峰誠意為下五章之要之說而言也

全章之旨 發明南山有臺詩好惡此言絜矩以用人之事節南山詩言不絜矩而所用非人又於或問申其說曰好惡宜專就用人說

按好惡所該甚廣用人亦其一事耳章句但言以民心為己心固不直指所好惡者為何事或問則以好其所好而與之聚惡其所惡而不以之施而究其義蓋本孟子所欲與聚所惡勿施之意為說可謂至明白矣發明必以用人實之疑非傳文本意竊詳此章

除首二節發出絜矩之名義外其下三引詩姑以明  
能絜矩與不能者之得失以起下文財用用人二者  
能絜矩與不能者之意末又以理財不當用小人者  
而總結之下文既皆以二事分合言之不應南山有臺  
等三詩獨偏舉用人一事以發之也蓋用賢固是民  
之所好上不外本內末使民有以為仰事俯育之資  
亦豈不是民之所好用小人固是民之所惡苛征重  
斂使民無以為仰事俯育之資亦豈不是民之所惡

然則正不當專指南山有臺節南山之好惡為用人而言也讀者但當熟玩章句或問語錄之意則發明之說未為的當可知矣

章末章句讀者不可以其近而忽之也 通曰纔有忽心便是不敬朱子曰敬者聖學之所以成始而成終者也欲學大學者可須更毫釐之不敬哉

陳公潜先生曰按章句所謂忽恐學者以其書為淺近而忽易讀過不加深體力行之功耳而通釋為敬

引聖學成始成終之語聖學之敬不但主於讀大學  
一書而已也

四書管窺卷一